



Suenter in enviern cun blera naiv vegnan las ovras da protecziun pertutgadas suttamessas ad ina controlla detagliada per eliminar uschè svelt sco pussaivel eventuals donns.

FOTO P. DE JONG

Suenter il grev enviern vegnan controlladas las ovras da protecziun

■ (cc) Quest enviern han ils rempars da lavinias en il Grischun stuì resister a grevas chargias, damai ch'igl ha dà surproporzionalmain blera naiv. Ussa vegnan las ovras da protecziun pertutgadas suttamessas ad ina controlla detagliada per eliminar uschè svelt sco pussaivel eventuals donns. In nov video da la chanzlia chantunala mussa il selvicultur chantunal Reto Hefti sin in da ses girs da controlla en la Val S. Pieder. Quest enviern hai dà surproporzionalmain blera naiv en las Vals dal sid dal Grischun, en l'Engiadina ed en parts da la Surselva. Ils rempars da lavinias èn vegnids cuvrìds per part u dal tuttafatg cun naiv. En tals cas vegn la situaziun

controllada permanentain dal specialist d'ovras da protecziun da l'Uffizi chantunal da guaud e privels da la natira (UGP) en stretga collavuraziun cun ils selviculturs da revier cumpetents. Minga onn e spezialmain suenter quest grev enviern vegnan las ovras pertutgadas suttamessas ad ina controlla detagliada tras las personas spezializadas cumpetentas. En la gronda part dals cas è quai il selvicultur da revier da la vischnanca pertutgada. La controlla dal stadi vegn fatga sin fundament da las directives prescrites ch'èn vegnidas elavuradas dal UGP. Ils rapports da controlla vegnan tramess al specialist responsabel dal UGP.

Il UGP registrescha il stadi da las

ovras da protecziun controlladas en in cataster ch'è previs spezialmain per quai, l'uschenumnà cataster da las ovras da protecziun. Tut tenor urgenza vegnan las ovras reparadas immediatmain. Las reparaturas èn bain savens charas, però èsi absolutain necessari d'eliminar quests donns per che las ovras possian ademplir lur incumbensa da protecziun envers la populaziun. Il patrun da construcziun respectiv, savens sa tracti da la vischnanca pertutgada, sto pajar ils custs che resultant. Per gronda part datti dentant in sustegn finanziel da la confederaziun e dal chantun.

Il video davart quest tema stat a disposiziun sut www.gr.ch